

讚

天廚供 純陀最後來 饑飡麻麥充皮袋
仙人又送齋食在 雙雙牧女獻香糜
四天王捧鉢 遙望靈山拜
南無普供養菩薩摩訶薩 (三唱)

恭聞

七佛世尊，作證明懺摩之主；七喻妙典，入菩提解脫之門。富有七珍法財，具足七菩提分。梅檀林以梅檀圍遶，師子王作師子嘖呻。無願不從，有求皆應；仰慈雲而廣布，同水月以含容。稽首於前，證明懺法。上來奉為，求懺我等，啓建慈悲道場懺法。茲當第七卷，入壇緣起。檀信轉加殷重，緇流如法修持。幢幡彩像以莊嚴，華果香燈而間列；精誠供養，百拜虔恭。切念求懺我等，多生父母，累劫怨親；在七趣之沈淪，故無惡而不造；縱七情之妄想，乃靡所而不為。起七慢之高山，欺賢罔聖；造七漏之煩惱，背覺合塵。七聚毘尼而失守，七遮逆罪以難逃。想應多劫，未經懺悔；今生慶幸，得遇佛乘。發露向諸佛像前，滌罪於大圓鏡裏。命我現前衆等，披閱懺悔靈文。緣起有涯，悲心無極；望佛哀憐，冥熏加被。

所有十方世界中 三世一切人師子
我以清淨身語意 一切徧禮盡無餘

第七卷入懺

啓運慈悲道場懺法一心歸命三世諸佛
南無過去毘婆尸佛 南無尸棄佛
南無毘舍浮佛 南無拘留孫佛
南無拘那含牟尼佛 南無迦葉佛
南無本師釋迦牟尼佛 南無當來彌勒尊佛

南無懺摩會上佛菩薩 (三稱)

慈悲道場懺法卷第七

今日道場，同業大眾！夫至德渺漠，本無言無說。然言者，德之詮、道之逕；說者，理之階、聖之導。所以藉言而顯理，顯理故非言；理由言彰，言不越理。雖言理兩乖，善惡殊絕；然影響相符，未曾差濫。在於初學，要因言以會道；至於無學，乃合理而忘言。自惟凡愚，惛惑障重；於諸法門，未能捨言。今識麤故，不盡其妙；見淺故，不臻其極。然言之且易，行之實難；惟聖與聖，乃得備舉。今有難言，自不能正，云何正他？汝自三業穢濁，云何勸人清淨？自不清淨，欲使他清淨，無有是處。既不堅固，何以勸人？今言行空說，便成惱他；他既生惱，何不且止？反覆尋省，寧不自愧？余是善知識，故發此言；於是整理衣服，斂容無對。今聞善知識此辭，心情慚惡，自知深過；不敢欺調聖人，隱覆其失。今欲毀之，恐脫有人，因此增福；適欲存之，復恐有人，由斯生謗。進退迴遑，不知所措。且立懺法，心既是善；

善法無礙，但應努力，不得計此。今惟憑世間，大慈悲父，覆護攝受！既有其言，不容毀滅，正當慚愧。大眾願無觸惱，若微與理合，相與因此懺法，改往修來，為善知識；如其不會衆心，願布施歡喜，不成惡知識，猶為菩提眷屬。

自慶第十

今日道場，同業大眾！從歸依以來，知至德可憑；斷疑、懺悔，則罪惑俱遣；續以發心，勸獎兼行；怨結已解，逍遙無礙。豈得不人人，踊躍歡喜，所應自慶？今宣其意。經云八難：一者地獄。二者餓鬼。三者畜生。四者邊地。五者長壽天。六者雖得人身，癱殘百疾。七者生邪見家。八者生於佛前，或生佛後。有此八難，所以衆生輪回生死，不得出離。我等相與，生在如來末法之中；雖不值佛，而慶事猶多。凡難之為語，罪在於心。若心生疑，非難成難；心若無疑，是難非難。何以知之？第八難云：生在佛前，或生佛後，是名為難；而城東老母，與佛同生一世，共佛俱在一處，而不見佛。故知心疑是難；未必異世，皆云是難。波旬懷惡，生陷地獄；龍聞說法，便得悟道。當知不必在於人天，便言非難；心苟不善，稟報不殊。六天之貴，墜落地獄；畜生之賤，超登道場。是則心邪故，輕難成重；心正故，重難無礙。

今日道場，同業大眾！以心礙故，觸向成難；心能正者，則難非難。舉此一條，在處可從。故知佛前佛後，無非正法；

邊地畜生，莫非道處。今若正心，則無復八難；如其疑惑，則難成無量。如是自慶，事實不少。大眾日用，不知其功。今略陳管見，示自慶之端。若知自慶，則復應須，修出世心。

何者自慶？佛言：地獄難免；相與已得，免離此苦，是一自慶。餓鬼難脫；相與已得，遠離痛切，是二自慶。畜生難捨；相與已得，不受其報，是三自慶。生在邊地，不知仁義；相與已得，共住中國，道法流行，親承妙旨，是四自慶。生長壽夭，不知植福；相與已得，復樹良因，是五自慶。人身難得，一失不返；相與已得，各獲人身，是六自慶。六根不具，不預善根；相與已得清淨，向深法門，是七自慶。世智辯聰，反成為難；相與一心，歸憑正法，是八自慶。佛前佛後，復謂為難；或云面不覩佛，又為大難；相與已能，發大善願，於未來世，誓拔衆生，不以不覩如來為難。但一見色像，一聞正法；自同在昔，鹿苑初唱。事貴滅罪，生人福業；不以不見佛故，稱之為難。佛言：見佛為難；相與已得，瞻對尊像，是九自慶。佛言：聞法復難；相與已得，滄服甘露，是十自慶。佛言：出家為難；相與已得，辭親割愛，歸向入道，是十一自慶。佛言：自利者易，利他為難；相與今日，一瞻一禮，普為回向，十方一切，是十二自慶。佛言：捍勞忍苦為難；相與今日，各自翹勤，為善不懈，是十三自慶。佛言：讀誦為難；我今時得披覽經典，是十四自慶。坐

禪為難；而今見有息心定意者，是十五自慶。

今日道場，同業大眾！如是自慶，事多無量；非復弱辭，所能宣盡。凡人處世，苦多樂少，一欣一喜，尚不可諧；況今相與，有多無礙？得此無礙，皆是十方，三寶威力。宜各至心，懷憶此恩，等一痛切，五體投地。奉為國家人主，土境人民，父母師長，上中下座，信施檀越，善惡知識；諸天諸仙，護世四王，聰明正直，天地虛空，主善罰惡，守護持呪，五方龍王，龍神八部；諸大魔王，五帝大魔，一切魔王；閻羅王，泰山府君，五道大神，十八獄主，并諸官屬；廣及三界六道，無窮無盡，含情抱識，有佛性者；至誠歸依十方，盡虛空界，一切三寶。願以慈悲心，同加攝受！以不可思議神力，覆護拯接；令諸天諸仙，一切神王；廣及三界六道，一切衆生；從今日去，越生死海，到於彼岸。行願早圓，俱登十地；入金剛心，成等正覺。

警緣三寶第十一

今日道場，同業大眾！宜復人人，緣念三寶，何以故爾？若使不知三寶，云何得起慈心，愍念衆生？若使不知三寶，云何得起悲心，救攝一切？若使不知三寶，云何得起平等心，怨親同觀？若使不知三寶，云何能得妙智，證無上道？若使不知三寶，云何明了二空，真實無相？佛言：人身難得，今已得；信心難生，今已生。我等今者，歸憑三寶；而眼不見

地獄、餓鬼，拔舌吐火之色。耳不聞地獄、餓鬼，苦楚熱惱之聲。鼻不聞地獄、餓鬼，剝裂膿血之氣。舌不嘗臭穢腐敗之味。身不觸鑊湯爐炭寒冰之苦。意常得知，佛為無上慈悲之父，作大醫王；知一切法，為諸衆生病之良藥；知諸賢聖，為一切衆生看病之母。意常警緣三寶護世；有識念處，我常得知。我等今日，雖不值佛，生在末法；具有信心，六根清淨，無諸衰惱；優遊適性，往來無礙。此之勝報，莫非宿緣，三寶恩力？又令今世，發菩提心；諸如此益，非可具說。豈得不人人，報恩供養？

今日道場，同業大眾！一切功德，供養中最。故經說言：惟念過去世，供養為輕微；蒙報歷遐劫，餘福值世尊。又經言：設欲報者，起塔精舍，燈燭幡蓋，華香茵褥，種種供養；將來之世，自受其福。雖是供養，非報佛恩。欲報佛恩，惟發菩提心，立四弘誓；造無量緣，莊嚴身相，修淨土行；是為智者，知恩報恩。

今日道場，同業大眾！諸佛慈悲，恩不可報。菩薩摩訶薩，碎身猶不能報萬分之一；況我凡夫，而能報者？衆等惟當，依經所說，利人為上。各各至心，五體投地。普為十方，無窮無盡，四生衆生；歸依世間，大慈悲父。

南無彌勒佛

南無釋迦牟尼佛

南無德寶佛	南無應名稱佛
南無華身佛	南無大音聲佛
南無辯才讚佛	南無金剛珠佛
南無無量壽佛	南無珠莊嚴佛
南無大王佛	南無德高行佛
南無高名佛	南無百光佛
南無喜悅佛	南無龍步佛
南無意願佛	南無寶月佛
南無滅已佛	南無喜王佛
南無調御佛	南無喜自在佛
南無寶髻佛	南無離畏佛
南無寶藏佛	南無月面佛
南無淨名佛	
南無無邊身菩薩	南無觀世音菩薩

又復歸依，如是十方，盡虛空界，一切三寶。願以慈悲力、覆護衆生力、大方便力、不思議力，令修懺眾等，普及法界一切有情。願生生世世，在在處處；常聞三寶之名，常瞻三寶之相，常蒙三寶光明照曜身心，常蒙三寶慈悲覆護身心，常獲三寶神力拔濟身心，常獲三寶智慧開悟身心，悟無生忍、證真實相。又願生生世世，在在處處；常知三寶之因，常念三寶之德，常稱讚三寶，常恭敬三寶，常供養三寶，常修建三寶，常護持三寶，常相續三寶。以此警緣三寶，知恩報

恩，人人各獲六根清淨，五眼圓明；四無量心，四無礙智，應念現前；六神通力，六波羅蜜，隨心自在。盡未來際，饒益有情。行願圓成，俱登正覺。

懺主謝大眾第十二

今日道場，同業大眾！相與已能，生堅固信，發菩提心，誓不退還；此是不可思議志力。此心此志，諸佛稱歎！今日惟深隨喜，願未來世，復得遭遇；捨身受身，願不相離；至於菩提，永為法親，慈悲眷屬。今建此法集，便成叨覩。智無其解，身乖其行；輕發此意，實足驚於視聽。然人微事重，冰炭交心；若不資藉強因，而無以獲勝妙之果。誠知謬造，心不忘善；冀蒙念力，同為慈親。仰屈大眾，降德道場。時運不留，忽爾垂邁；緣行所牽，勝會難期。當自課勵，兼以利人；卓然排羣，莫追後悔。法音經耳，功報彌劫；一念之善，永得資身。一向一志，無願不獲。相與人人，各各至心，五體投地；歸依世間，大慈悲父。

南無彌勒佛	南無釋迦牟尼佛
南無威德寂滅佛	南無愛相佛
南無多天佛	南無須炎摩佛
南無天愛佛	南無寶衆佛
南無寶步佛	南無師子分佛
南無極高行佛	南無人王佛

南無善意佛 南無世明佛
南無寶威德佛 南無德乘佛
南無覺想佛 南無喜莊嚴佛
南無香濟佛 南無香像佛
南無衆炎佛 南無慈相佛
南無妙香佛 南無堅鎧佛
南無威德猛佛 南無珠鎧佛
南無仁賢佛
南無無邊身菩薩 南無觀世音菩薩

又復歸依，如是十方，盡虛空界，一切三寶。願此道場，同業大眾；廣及法界，一切有情。同一菩提心，同一菩提願。願從今日，盡未來際。生生世世，常為三寶眷屬；同為智慧法親，同為慈悲骨肉，同處修因，同處證果；音響相應，形影相隨。莊嚴淨土，歷事諸佛；同行同到，救護世界；接引衆生，同力同作。法身本無二體，行願亦同一致。三身四智，同得圓成；八解六通，同一自在。饒益將來，同登正覺。

總發大願第十三

今日道場，同業大眾！相與又以今日，懺悔、發心，功德因緣；願十方盡虛空界，一切天主，一切諸天，各及眷屬。又願仙主，一切真仙，各及眷屬。又願梵王帝釋，護世四王，神王神將，各及眷屬。又願聰明正直，天地虛空，主善罰惡

，守護持呪，一切神王，一切神將，各及眷屬。又願妙化龍王，頭化提龍王，五方龍王，龍神八部，八部神王，八部神將，各及眷屬。又願阿修羅王，一切神王，一切神將，各及眷屬。又願人道，一切人主，朝野各界，各及眷屬。又願十方比丘、比丘尼、式叉摩那、沙彌、沙彌尼，各及眷屬。又願閻羅王，泰山府君，五道大神，十八獄主，一切神王，一切神將，各及眷屬。又願地獄道，一切衆生；餓鬼道，一切衆生；畜生道，一切衆生，各及眷屬。又願十方，盡虛空界，窮未來際，若大若小，一切衆生，各及眷屬。又願若後流衆生，異願界者；皆悉令入，大願海中；各各具足，功德智慧。如是三界內外，無窮無盡，一切衆生，名色所攝，有佛性者。我等今日，仰承十方，盡虛空界，一切諸佛，大慈悲力；諸大菩薩，一切賢聖，本誓願力；無量無盡智慧力、無量無盡功德力，自在神通力，覆護衆生力，安慰衆生力，盡諸天諸仙漏力，攝化一切善神力，救拔地獄衆生力，濟度一切餓鬼力，免脫一切畜生力，令諸衆生，得如所願。我等今日，又承慈悲道場力、歸依三寶力、斷疑生信力、懺悔發心力、解怨釋結力、自慶歡喜力、踴躍至心力、發願回向善根力；令諸衆生，得如所願。

我等今日，又承七佛大慈心力，十方諸佛大悲心力，三十五佛滅煩惱力，五十三佛降伏魔力，百七十佛度衆生力，千佛攝受衆生力，十二菩薩覆護衆生力，無邊身、觀世音流通懺

力；願令十方，三界六道，窮未來際，一切衆生，若大若小，若升若降，名色所攝，有佛性者。從今懺悔之後，在所生處，各得諸佛，諸大菩薩，廣大智慧，不可思議，無量自在神力身；六度身，正向菩提；四攝身，不捨一切；大悲身，拔一切苦；大慈身，與一切樂；功德身，饒益一切；智慧身，說法無窮；金剛身，物不能壞；淨法身，遠離生死；方便身，現自在力；菩提身，隨一切時，成三菩提。願四生六道，一切衆生，皆悉具足，如是等身；具足成就，諸佛無上大智慧身。

又願十方，一切衆生；從今日去，在所生處，各得諸佛菩薩，不可思議，功德之口；柔軟口，安樂一切；甘露口，清涼一切；不虛口，說真實法；如實轉口，乃至夢中，無有虛言；尊重口，釋梵四王，恭敬尊重；甚深口，顯示法性；堅固口，說不退法；正直口，具足辯才；莊嚴口，隨時隨業，普皆示現；一切智口，隨其所應，度脫一切。願四生六道，一切衆生，皆悉具足，諸佛菩薩，清淨口業。

又願十方，一切衆生；從今日去，在所生處，各得諸佛菩薩，不可思議，大智慧心；常有厭離煩惱心、猛利心、堅強心、金剛心、不退心、清淨心、明了心、求善心、莊嚴心、廣大心。有大智慧力，有所聞法，即自開解；慈心向人，斷諸怨結。住於羞恥，常懷慚愧；不計吾我，同善知識。見有布

施、持戒、忍辱、精進、禪定、智慧之人，咸生歡喜；怨親一觀，心無憍慢。不說他人善惡長短，不傳彼此和合分離；所言柔軟，不出惡辭。歎佛功德，樂學深經；愛護衆生，如己無異。見有作福，不行誹謗；慈心和合，猶如聖衆。同諸菩薩，成等正覺。

奉為天道禮佛第十四

今日道場，同業大衆！諸天諸仙，一切善神；於諸衆生，有無量不可思議恩德。願諸衆生，長保安樂；慇懃守護，惟善是從。何以知然？佛敕

提頭賴吒四天王	慈心擁護受持經
令聞慈悲名號者	猶如天子法臣護
又勅海龍伊鉢羅	慈心擁護受持經
如護眼目愛己子	晝夜六時不遠離
又勅閻婆羅刹子	無數毒龍及龍女
慈心擁護持經者	如愛頂腦不敢觸
又勅毘留勒迦王	慈心擁護受持經
如母愛子心無厭	晝夜擁護行住俱
又勅難陀跋難陀	娑伽羅王優波陀
慈心擁護持經者	恭敬供養接足禮
猶如諸天奉帝釋	亦如孝子敬父母
慈悲道場施安樂	教諸衆生結法親
後生佛前入三昧	畢竟當得不退轉

若聞諸佛名號者 又聞無邊觀世音
消除三障無諸惡 五眼具足成菩提
諸天神王念一切 恆加勸獎助威神

今日道場，同業大眾！諸天神王，有如此恩德，覆護衆生；而諸衆生，未曾發心，念報恩德。古人尚能感一糞之惠，遂捨命亡身；而況諸天善神，八部神將，於諸衆生，有此恩德？此恩此德，功無邊際。我等今日，懺悔、發心，皆是天王，密加神力，獎助行人，使心成就；若不加助，如是等心、早應退沒。所以菩薩摩訶薩，每歎善知識者，是大因緣；能令我等，登踐道場。若無善知識；云何令我，得見諸佛？投身不足報洪慈，殞命不足報深澤。菩薩摩訶薩，尚致此言；況降斯以下，而無報答？大眾今日，既未能投骸殞命；則應且行勤勞，亦是報恩之漸。相與各宜，增到運心，知恩報恩；不可隨流，自反無方。如前自慶，重遇為難；難得今果，復欲何待？失此一會，知更何趣？惟當勇猛，忘身為物。事成有敗，如春有冬；時不待人，命焉得久？念此一別，相見未期；各自努力，等一痛切，五體投地。奉為十方，盡虛空界，一切天主，一切諸天，各及眷屬；歸命敬禮世間，大慈悲父。

南無彌勒佛 南無釋迦牟尼佛
南無善逝月佛 南無梵自在王佛

南無師子月佛 南無福威德佛
南無正生佛 南無無勝佛
南無日觀佛 南無寶名佛
南無大精進佛 南無山光王佛
南無施明佛 南無電德佛
南無德聚王佛 南無供養名佛
南無法讚佛 南無寶語佛
南無救命佛 南無善戒佛
南無善衆佛 南無定意佛
南無喜勝王佛 南無師子光佛
南無破有闍佛 南無照明佛
南無上名佛
南無無邊身菩薩 南無觀世音菩薩

又復歸命，如是十方，盡虛空界，一切三寶。願以慈悲力，同加攝受！願十方盡空法界，一切天主，一切諸天，各及眷屬；平等空慧，恆得現前；智力方便，開無漏道；十地行願，各得增明。六度修心，四等廣被；行菩薩道，入佛行處。四弘誓願，不捨衆生；辯才不斷，樂說無窮。善權接化，利益四生；俱登法雲，證常住果。

奉為諸仙禮佛第十五

今日道場，同業大眾！人各至心，等一痛切，五體投地。奉

為十方，盡虛空界，一切仙主，一切真仙，各及眷屬；歸命敬禮世間，大慈悲父。

南無彌勒佛	南無釋迦牟尼佛
南無利慧王佛	南無珠月光佛
南無威光王佛	南無不破論佛
南無光明王佛	南無珠輪佛
南無世師佛	南無吉手佛
南無善月佛	南無寶炎佛
南無羅睺守佛	南無樂菩提佛
南無等光佛	南無至寂滅佛
南無世最妙佛	南無無憂佛
南無十勢力佛	南無喜力王佛
南無德勢力佛	南無德勢佛
南無大勢力佛	南無功德藏佛
南無真行佛	南無上安佛
南無提沙佛	
南無無邊身菩薩	南無觀世音菩薩

又復歸命，如是十方，盡虛空界，一切三寶。願以慈悲力、同加攝受！願諸仙主，一切真仙，各及眷屬；解脫客塵，清淨緣障；妙色湛然，等佛身相。四無量心，六波羅蜜，常得現前；四無礙智，六神通力，如意自在。出入遊戲，菩薩境

界；等法雲地，入金剛心。以不思議力，還接六道。

奉為梵王等禮佛第十六

今日道場，同業大眾！重復至誠，五體投地。奉為梵王帝釋，護世四王，各及眷屬；歸命敬禮世間，大慈悲父。

南無彌勒佛

南無釋迦牟尼佛

南無大光佛

南無電明佛

南無廣德佛

南無珍寶佛

南無福德明佛

南無造鎧佛

南無成手佛

南無善華佛

南無集寶佛

南無大海佛

南無持地佛

南無義意佛

南無善思惟佛

南無德輪佛

南無寶光佛

南無利益佛

南無世月佛

南無美音佛

南無梵相佛

南無衆師首佛

南無師子行佛

南無難施佛

南無應供佛

南無明威德佛

南無大光王佛

南無無邊身菩薩

南無觀世音菩薩

又復歸依，如是十方，盡虛空界，一切三寶。願以慈悲力，同加攝受！願梵王帝釋，護世四王，各及眷屬；六度四等，日夜增明；四無礙辯，樂說無盡。得八自在，具六神通。三昧總持，應念現前；慈悲普覆，十方四生。百福莊嚴，萬善圓極；三達開了，五眼具足；為法輪王，攝化六道。

慈悲道場懺法卷第七

七佛滅罪真言

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶（七遍）

補闕真言

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶（三遍）

讚

逍遙無礙 自慶當陳 警緣三寶是真因
相與意諄諄 普禮慈尊 奉報上天恩
南無遠行地菩薩摩訶薩（三唱）

出懺

七佛慈仁，歸依者，不墮十八之地獄；七聚淨戒，受持者，更生化樂之天宮。惟願慈悲，證明丹悃！救七聚之異類，坐

七寶之華臺。願垂無極之大悲，俯察有情之微懇。上來奉為
，求懺我等，修崇慈悲道場懺法。今當第七卷，功課圓滿。
我諸衆等，入懺出懺，念茲在茲。燈然慧炬，供獻純陀。金
爐騰藹藹之祥雲，玉燭吐煌煌之瑞氣；鐘磬響鏗鏘之法韻，
華果陳上品之嘉珍。供獻蘋蘩，華呈蒼荀；供養巍巍之善逝
，宣揚句句之伽陀。唱落落之玄音，讚雄雄之聖德；入默默
之禪思，集種種之妙行。先伸回向佛菩提，十聖三賢同證鑑
；然後普資於沙界，四恩三有盡沾恩。出生功德，今為求懺
我等，淨諸業障，獲大吉祥。伏願：七漏盡而七覺華開，性
天朗耀；七戒淨而七遮清淨，苦海波澄。摧七慢之高山，了
七情之妄想；獲七財之法藏，度七趣之有情。化劍樹為七寶
之香林，變業地作七珍之聖域。餘業果以難逃，屈衆慈而懺
悔。

讚

梁皇懺 七卷功德力 願滅信人七支罪
親證菩薩遠行地 懺文舉處罪華飛
解了怨 懺了罪 消災增福慧
蓮池海會願相逢 彌陀佛前親受記
南無蓮池會菩薩摩訶薩 (三唱)

舉讚

梁皇懺 七卷已全周 回向四恩并三有

拜懺我等增福壽 惟願亡靈往西遊

遠行地菩薩 惟願哀納受

南無登雲路菩薩摩訶薩 (三唱)